

INUIT ATAQATIGIIT

INATSISARTUNI



25. februar 2010

UPA 2010/38

Inatsisartut Suleriaasianni § 32 naapertorlugu aalajangiiffigisassatut siunnersuut imaattoq matumuuna saqqummiuppara:

Innarluutillit ukiuni qulini atuartussaataanerup saniatiguit ilinniaqqinnissamut periarfissaasa annertusarsinnaajumallugit Naalakkersuisut pilersaarummik 2011-mi saqqummiussaqaqqullugit Inatsisartut aalajangiiffigisassaattut siunnersuut.
(Inatsisartunut ilaasortaq Jane Petersen, Inuit Ataqatigiit)

Tunngavilersuut:

Ullumikkut ajoraluartumik innarluutilinnut sulisinnaanikkut, ilinniartitaanikkut, piginnaanngorsaaqqinnissamullu periarfissiissutaasut naammaginangilluinnartuusut nassuerutigisariaqarparput. Innarluutillit inuiaqatigiinni ilinniartitaanikkut periarfissaqarnerat naammaginanngeqaaq, taamaattumillu inuttut ineriartornissaminnik pakkersimaarneqarnerat inuiaqatigiini suliasatta ilagilluinnarpaat.

Meeqqat atuarfiat pillugu inatsisitoqaaq naapertorlugu atuartut 20-liinissamik tungaannut atuartinneqarsinnaasimapput. Atuartussaataaneramik sivitsuisinnaaneq atuarfik pillugu peqqussummi nutaami atuutinngilaq, tassanimi ukiuni qulini taamaallaat atuartussaatisoqarmat. Taamaattumik tamatuma kingorna assersuutigalugu inuusuttunik innarluutilinnik atuartitsineq, sulitinneqarnerat, sammisassaqartinneqarnerat il.il. inatsisit allat naapertorlugit maanna pisarput, soorlu sunngiffimmi atuartitsinnermut, piginnaanngorsaaqqinnermut, innarluutilinnut meeqqanullu, siusinaartumik soraarnerussutisialinnut il.il. inatsisit malillugit. Tassalu sulii inersimasunut inuusuttunullu timimikkut eqqarsartaatsimikkullu innarluutilinnut immikkut atuartitsinnermut ataatsimoortumik ataqatigiissumik maannamut inatsiseqartitsinngilagut.

Taamaattumik isumaqarpunga ukiuni aggersuni anguniartariaqaripput, soorlu Danmarkimi innarluutilinnut inatsisitigut atortinneqartunut assingusumik immikkut maleruagassiortariaqartugut. Danmarkimi ilaatigut Inatsiseqarpoq inersimasunut immikkut ittumik atuartitsinnermut tunngatitaq nr. 866 7/11 1995-meersoq kingornalu allanngortinneqarsimasoq, kiisalu Inatsit nr. 564 6/6 2007-meersoq inuusuttunut immikkut pisariaqartitsisunut inuusuttullu ilinniartitaanissamut inatsisartut tunngasoq.

Nalunaarusiami taaguutilimmi: “Innarluutillit atuartitaanissamut, ilinniartitaanissamut suliffeqarnissamullu ullumikkut periarfissaat tamakkunungalu aporfissat” aprilimi 2009-mi taamani Ilaqutariinnermut Peqqissutsimullu Naalakkersuisoqarfiusumit kiisalu Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoqarfimmit saqqummiunneqartumit, ilaatigut imatut inerniliisoqarpoq: (Issuaaneq)

“Inatsisitigut periarfissaqaraluartoq innarluutilippassuit ilaquataallu siusinaartumik soraarnerussutisiaqalernissamut innersuunneqakkajuttarput, imaluunniit **atuartinneqaratik, ilinniartinneqaratik** sulitinneqaratillu. Tamanna arlalinnik pissuteqarsinnaavoq:

1. **Inatsisinut taakkulu aqutigalugit periarfissanut ilisimasaqannginneq.**
2. Tapersortinik isumaginninnikkut perorsaanermik ilinniarsimasunik, suliamik ilinniagalinnik inunnillu suliassaqarfimmik immikkut ilisimasalinnik amigaateqarneq.
3. **Kommunit ataasiakkaanit innarluutilinnut neqerooruteqannginneq – suliassaqarfimmik tunulliusinermik pissuteqakkajuttartoq.**
4. Innarluutillit assigiinngitsorpassuit siammasippallaarnerat.
5. Innarluutillit pillugit inuiaqatigiinni nalinginnaasumik ilisimasaqannginneq.” (Issuaaneq naavoq)

Taamaattumik erseqqippoq innarluutillit atuartinneqarnissaminnut, ilinniagaqarnissaminnut suliffeqarnissaminnullu inatsisitigut neqeroorfigineqartarnerat iluarsiivigissallugu pissutissaqarluartugut.

Aammattaaq inuusuttut innarluuteqarlutik meeqqat atuarfianniit anereermermi kingorna inuusuttut ilinniaqqiffiiniissinnaanngitsut eqqarsaatigalugit, Kommunalbestyrelsen immikkut ittumik atuartitsinermut neqerooruteqarnissamut pisussaaffeqarnerata inatsimmi atuuttumi erseqqissaavigineqarnissaanut pisariaqartitsisoqartoq malunnarpoq.

Inuiaqatigiinni innarluuteqartunik ilaqarpugut ilaqartuassallutalu. Innuttaaqatigut taakku inuiaqatigiinni tamakkiinngikkaluartumik suleqataanissartik aammalu ilinniartitaanikkut periarfissinneqarnissartik kissaatigaat. Oqaatigineqareersutulli sulii inersimasunut inuusuttunullu timimikkut eqqarsartaatsimikkullu innarluutilinnut immikkut atuartitsinermut ataatsimoortumik ataqatigiissumik maannamut inatsiseqartitsinngilagut, tamannalu isumaqarpunga iluarsiivigissallugu maanna piffissanngortoq.

Taamaammatt innarluutillit ukiuni qulini atuartussaataitanerup saniatigut ilinniaqqinnissamut periarfissaasa annertusarsinnaajumallugit siunnersuutigaara tamanna pillugu Naalakkersuisut pilersaarummik 2011-mi saqqummiussaqaassasut, neriuppungalu tamanna Inatsisartuni ilasilluarneqarumaartoq.